

宋史新編

宋史新編卷一百六十六

列傳一百八

明同宗戶部主事莆田柯維騏著

儒林

范冲

朱震

胡安國

子寅宏從子憲

陳亮

鄧樵

附林震

李道傳

兄心傳

范冲字元長祖禹子也登紹聖進士第歷兩淮轉運副使紹興重修神哲實錄召爲宗正少卿兼直史館初祖禹元祐中嘗修神宗實錄盡書王安石之過以明神宗之聖其後安石壻蔡卞惡之祖禹坐謫死嶺表至是復以命冲上曰兩朝大典皆爲姦臣所壞故以屬卿遷起

居郎又升兼侍讀會皇子建國公瑗出就傳首命冲以
徽猷閣待制提舉建隆觀爲資善堂翊善而朱震兼贊
讀冲震皆一時名德老成極天下之選遷翰林侍讀學
士用其父故事也尋以龍圖閣直學士奉祠卒年七十
五冲之修神宗實錄爲考異明示去取舊文墨書刪去
者黃書新修者朱書世號朱墨史及修哲宗實錄又著
辨誣錄冲性好義樂善司馬光家屬皆依冲所撫育之
請以光之族曾孫宗召主光祠又嘗薦尹焞自代云
朱震字子發荆門人登政和進士第仕州縣以廉稱胡
寅薦於高宗召爲司勳員外郎稱疾不至會趙鼎入

爲叅知政事上詔以當世人才鼎曰臣所知朱震學術
深博廉正守道士之冠冕上乃召之擢祠部員外郎兼
川陝荆襄都督府詳議官遷祕書少監兼侍經筵轉起
居郎建國公出就傳以震爲贊讀遷中書舍人兼御史善
累遷翰林學士是時虔州民爲盜選良太守往慰撫之
震曰使居官者廉而不擾則百姓自安願詔新太守到
官之日條具官吏有貪墨無狀者一切罷去聽其自擇
慈祥仁惠之人從之紹興七年震謝病丐祠旋知禮部
貢舉會疾卒震經學深醇有源上易解云陳搏以先天
圖傳种放放傳穆脩穆脩傳李之才之才傳邵雍放以

河圖洛書傳李旣旣傳許堅許堅傳范諤昌諤昌傳劉
牧穆脩以太極圖傳周惇頤惇頤傳程顥程頤是時張
載講學於二程邵雍之間故雍著皇極經世書牧陳天
地五十有五之數惇頤作通書程頤著易傳載造太和
參兩篇臣今以易傳爲宗和會雍載之論上采漢魏吳
晉下逮有唐及今包括異同庶幾道離而復合蓋其學
以王弼盡去舊說雜以莊老專尚文辭爲非是故其於
象數加詳焉其論圖書授受源委如此蓋莫知其所自
云

胡安國字康侯崇安人入太學登進士第哲宗親擢第

三爲太學博士足不躡權門提舉湖南學事有詔舉遺
逸安國以永州布衣王繪鄧境應詔零陵簿稱二人黨
人范純仁客而流人鄒浩所請託也蔡京素惡安國與
已異得簿言大喜命推鞠無驗安國竟除名未幾復官
父沒謂子弟曰吾昔爲親而仕今雖有祿萬鍾將何所
施遂稱疾不仕築墓傍若將終焉宣和末以薦除也
田郎辭靖康元年除太常少卿辭除起居郎又辭朝旨
屢趣行至京師以疾在告一日方午欽宗亟召見安國
奏曰明君以務學爲急聖學以正心爲要又言爲天下
國家必有一定不可易之計謀議既定君臣固守故有

志必成治功可立欽宗曰比留詞掖相待已命召卿試
矣時門下侍郎耿南仲倚禁附恩凡與已不合者卽指
爲朋黨乃言安國意窺經筵不宜召試欽宗不答安國
屢辭南仲又言安國不臣欽宗問其狀南仲曰徃不事
上皇今又不事陛下欽宗曰渠自以病辭初非有向背
也每臣僚登對欽宗卽問識胡安國否中丞許翰曰自
蔡京得政士大夫無不受其籠絡超然遠跡不爲所汙
如安國者實鮮欽宗嘆息令勉受命旣試除中書舍人
南仲諷臺諫論其檮命不恭宜從黜削疏奏不下安國
乃就職中書侍郎何桌建議分天下爲四道置四都總

管各付一面以衛王室捍疆敵安國言內外之勢適平
則安偏重則危今州郡太輕理宜通變分爲四道權恐
太重萬一抗衡跋扈何以待之尋以趙野總北道安國
言魏都地重野必誤委寄是冬金人大入野遁爲群盜
所殺西道王襄擁衆不復北顧如安國言李綱罷中書
舍人劉珏行詞謂綱勇於報國數至敗衄坐貶安國封
還詞頭何棗從而擠之詔與郡衆以安國素苦足疾而
海門地里濕乃除安國右文殿修撰知通州安國在省
一月多在告之日及出必有所論列或曰事之小者盍
姑置之安國曰事之大者無不起於細微今以小事爲

不必言至於大事又不敢言是無時而可言也高宗卽位以給事中召黃潛善諷給事中康執權論其託疾罷之三年樞密張浚薦安國可大用再除給事中賜其子起居郎寅手札令以上意催促旣次池州聞駕幸吳越引疾還紹興元年除中書舍人兼侍講遣使趣召安國先以時政論獻論入復除給事中其論之目曰定計建都設險制國卹民立政覈實尚志正心養氣宏度寬隱安國嘗謂雖諸葛復生爲今日計不能易此論也尋除兼侍讀專講春秋會除故相朱勝非同都督江淮荆浙諸軍事安國奏勝非與黃潛善汪伯彥同在政府緘默

計會循致渡江尊用張邦昌結奸全國淪滅三綱天下
憤鬱及正位冢司苗劉肆逆貪生苟容辱逮君父今彊
敵憑陵叛臣不忌用人得失係國安危深恐勝非上誤
大計勝非改除侍讀安國持錄黃不下左相呂頤浩特
命校正黃龜年書行安國言有官守者不得其職則去
况勝非係臣論列之人今朝廷乃稱苗劉之變能調護
聖躬昔公羊氏言祭仲廢君爲行權先儒力排其說蓋
權宜廢置非所施於君父春秋大法尤謹於此臣以講
春秋之時而與勝非爲列有違經訓遂臥家不出時呂
頤浩再相欲傾右相秦檜謀於席益曰目爲黨可也今

黨魁胡安國在瑣闥當先去之乃降旨曰胡安國屢召
偃蹇不至今始造朝又數有請豈不以時艱不肯盡瘁
乃欲求微罪而去其自爲謀則善如國計何落職奉祠
是夕彗出東南秦檜三上章乞留之不報侍御史江躋
上疏極言勝非不可用安國不當責右司諫吳表臣亦
言安國無故罪去恐非所以示天下不報顧浩卽黜給
事中程瑀起居舍人張等二十餘人云應天變
除舊布新之象臺省一空勝非遂相安國竟歸五年除
徽猷閣待制知永州辭詔從其請與祠令纂修所著春
秋傳書成高宗謂深得聖人之旨除內祠兼侍讀未行

諫官陳公輔疏詆假託程頤之學者安國奏曰本朝自
嘉祐以來西都有邵雍程頤及其弟頤關中有張載皆
以道德名世會王安石蔡京等曲加排抑故其道不行
望下禮官討論故事加之封爵載在祀典仍詔館閣裒
其遺書頒行使邪說者不得作奏入公輔與中丞周祕
侍御史石公揆承望宰相風旨交章論安國學術頗僻
除知末州辭復予祠進寶文閣直學士卒年六十五贈
四官又詔加賻賜田十頃恤其孤諡文定安國初問人
材於游酢酢以泰檜爲言且比之荀文若故安國力稱
檜賢檜亦力引安國及檜再相誤國安國不及見也安

國強學力行以聖人爲標的志於康濟時艱見中原淪
沒遺黎塗炭常若痛切於其身然風度凝遠翛然塵表
視天下萬物無足以嬰其心自登第迄謝事四十年在
官實歷不及六載朱震被召問出處之宜安國曰子發
學易二十年此事當素定矣世間惟講學論政不可一
切切詢究至於行已大致去就語默之幾如人飲食其
饑飽寒溫必自斟酌不可決諸人亦非人所能決也吾
平生出處皆內斷於心浮世利名如蟻蠓過前何足道
哉故渡江以來儒者進退合義以安國尹焞爲稱首侯
仲良歎曰吾以爲志在天下視不義富貴真如浮雲者

二程先生而已不意復有斯人也謝良佐曰胡康侯如
大冬嚴雪百草萎死而松柏挺然獨秀者也自王安石
廢春秋不列學官安國謂先聖筆削之書乃使人主不
得聞講說學士不得相傳習亂倫滅理殆由乎此故潛
心是書二十餘年每嘆曰此傳心要典也有文集十五
卷資治通鑑舉要補遺一百卷三子寅宏寧從子憲
寅字明仲安國弟之子寅將生母以多男不欲舉安國
妻夢大魚躍盆水中急取而予之少桀黠難制父閉之
空閣上有雜木寅盡刻爲人形安國曰當有以移其心
別置書數千卷於其上年餘寅悉成誦不遺一卷游辟

雍中進士甲科靖康初以薦除祕書省校書郎楊時爲
祭酒寅從之受學遷司門員外郎金人陷京師議立異
姓寅與張浚趙鼎逃太學中不書議狀張邦昌僞立寅
棄官歸言者劾其離次降一官建炎中連擢起居郎金
人南侵時高宗在金陵詔議移蹕之所寅上書其略曰
自古中興之主所以能克復舊物者莫不本於憤恥恨
怒不能報怨終不苟已未有乘衰微闕絕之後固陋以
爲榮苟且以爲安而能久長無禍者也今日圖復中興
之策莫大於罷免和議以使命之幣爲養兵之資不然
則辭處東南萬事不競納賂則孰富於京宣納質則孰

重於二聖反復計之所謂乞和決無可成之理夫大亂
後風俗靡然欲丕變之在於務實效去虛文治兵擇
將誓戮大憝者孝弟之實也屈已求賢信用群策者求
賢之實也不惟面從必將心改苟利於國卽日行之者
納諫之實也擢智勇忠直之人待御以恩威結約以誠
信者任將之實也汰疲弱擇壯勇足其衣食申明階級
以變其驕悍之習者治軍之實也遴選守刺久於其官
痛刈姦賊廣行寬恤者愛民之實也君子小人勢不兩
立仁宗皇帝在位得君子最多小人亦時見用然罪著
則斥君子亦或見廢然忠顯則收故其成當世之功貽

後人之輔者皆君子也至王安石則不然斥絕君子一去而不還崇信小人一任則不改故其敗當時之政爲後世之害者皆小人也所以誤國破家至毒至烈以致二聖屈辱羿莽擅朝伏節死難者不過二人此浮華輕薄之害明主之所畏而深戒者也宰相呂頤浩惡其切直除直龍圖閣奉祠紹興二年五月詔內外官各言省費裕國強兵息民之策寅以十事應詔曰修政事備邊陲治軍旅用人才除盜賊信賞罰理財用核名實屏諛佞去姦慝疏上不報尋命知永州四年復召爲起居郎遷中書舍人時議遣使入雲中寅上疏言女真驚動

陵寢殘毀宗廟刼質二聖乃吾國之大讎也誤國之臣
遣使求和以苟歲月九年于茲其效如何幸陛下灼見
邪言漸圖恢復然後二聖之怨可平陛下人子之職舉
矣高宗嘉納召至都堂諭旨仍降詔獎諭旣而右僕射
張浚自江上還奏遣使爲兵家機權竟反前旨寅復奏
䟽言今日大計只合明復讎之義用賢修德息兵訓民
以圖北向儻或未可則堅守待時若夫二三其德無一
定之論必不能有所立寅旣與浚異遂乞便郡就養除
徽猷閣待制知邵州辭改集英殿修撰復以待制改知
嚴州又改知永州徽宗皇帝寧德皇后訃至朝廷用故

事以日易月寅上䟽言禮讎不復則服不除願降詔旨服喪三年衣墨臨戎以化天下尋除禮部侍郎兼侍講兼直學士院父喪除適秦檜當國除徽猷閣直學士奉祠俄乞致仕遂歸衡州檜旣忌寅雖告老猶憤之坐與李光書譏訕朝政落職右正言章復劾寅責授果州團練副使新州安置檜死詔自便尋復其官卒年五十九寅志節豪邁初擢第中書侍郎張邦昌欲以女妻之不許始安國頗重秦檜之大節及檜擅國寅遂與之絕在謫所著讀史管見數十萬言及論語詳說皆行于世其集曰斐然集

宏字仁仲幼事楊時侯仲良而卒傳其父之學優游衡
山下餘二十年玩心神明不舍晝夜張栻師事之紹興
間上書其略曰治天下有本仁也何謂仁心也察天理
莫如屏欲存良心莫如立志陛下試思方今之世事孰
爲大乎孰爲急乎則良心可察而臣言可信矣昔舜以
匹夫爲天子瞽叟以匹夫爲天子父受天下之養豈不
足於窮約哉而瞽叟猶不悅自常情觀之舜可以免矣
而舜蹙然有憂之舉天下之大無足以解憂者微欽二
帝劫於讎敵遠適窮荒引領東望九年于此矣在廷之
臣不能對揚天心反以天子之尊北面讎敵陛下自念

於辭何如也且群臣智謀淺短自度不足以任大事故
欲偷安江左貪圖寵榮皆爲身謀爾陛下乃信之以爲
必恃是可以進撫中原展省陵廟來歸兩宮亦何誤耶
末言陛下卽位以來中正邪佞更進更退然陳東以直
諫死于前馬伸以正論死于後而未聞誅一姦邪黜一
諛佞何確中正之力而去姦邪之難臣竊傷陛下威權
之不在已也高閈爲國子司業請幸太學宏見其表作
書責之曰昔楚懷王不返楚人憐之如悲親戚太上皇
帝劫制於彊敵生往死歸此臣子痛心切骨臥薪嘗膽
宜思所以必報也而柄臣乃敢欺天罔人以大讎爲大

恩乎昔宋公爲楚所執及楚釋之孔子筆削春秋乃曰
諸侯盟于薄釋宋公不許楚人制中國之命也太母天
下之母其縱釋乃在金人此中華之大辱臣子所不忍
言也而柄臣乃敢欺天罔人以大辱爲大恩乎晉朝廢
太后董養游大學升堂漢曰天人之理旣滅大亂將作
矣則引遠而去今閣下偃然爲天下師儒之首旣不能
建大論明天人之理以正君心乃阿諛柄臣希合風旨
求舉太平之典又爲之詞欺天罔人孰甚焉宏初以蔭
補石承務郎不調檜死宏被召竟以疾辭卒于家著書
曰知言張栻謂其言約義精道學之樞要制治之蓍龜

也有詩文五卷皇王大紀八十卷

寧字和仲以蔭補官試館職除敕令所刪定官遷祠部郎官寧以父兄故召用及寅與檜忤乃出寧爲夔路安撫司叅議官除知澧州不赴奉祠卒安國作春秋傳修纂檢討盡出寧手寧又著春秋通旨以羽翼其書云

憲字原仲居建之崇安從從父安國學平居危坐植立雖倉卒無疾言遽色人犯之未嘗校紹興中以鄉貢入太學會伊洛學有禁憲獨陰與劉勉之誦習其說旣而學易於譙定父未有得定曰心爲物憤故不能有見唯學乃可明耳憲喟然歎曰所謂學者非克己工夫耶一

且揖諸生歸故山力田賣藥以奉其親從游者日衆號
籍溪先生累召累辭乃賜進士出身授左迪功郎添差
建州教授憲猶不屈太守魏玘開譬甚力憲不得已就
職訓諸生以爲己之學聞者始而笑中而疑久而觀其
所以修身事親接人者無一不如所言遂翕然悅服郡
人程元以篤行稱龔何以廉節著皆迎致俾參學政學
者自是大化因七年不徙官以母年高不樂居官合求
監南獄廟以歸久之起爲福建路安撫使司屬官與帥
張宗元不合復請祠去秦檜方用事諸賢零落憲家居
不出檜死召爲祕書正字旣至䟽言金人勢必敗盟元

臣宿將惟張浚劉錡在願亟起之時兩人皆爲積毀所傷未有敢顯言者憲疏入卽求去上嘉其忠詔改秩更祠歸初憲與劉勉之俱隱後又與劉子翬朱松交松將沒屬子熹並受學熹自謂從三君子遊而事籍溪先生爲久方憲以館職召也適秦檜諱言之後憲與王十朋馮方查齋李浩相繼論事太學生爲王賢詩以歌之衆始信其不苟出而惜匪父于位卒年七十七

陳亮字周父永康人生而目光有芒爲人才氣超邁喜談兵論議風生下筆數千言立就掌攷古人用兵成敗之論古論隆興初與金人約和天下忻然幸得蘇

息濁亮持不可婺州方以解頭薦因上中興五論奏入
不報已而退修于家學者多歸之益力學著書者十年
先是亮嘗園視錢塘喟然嘆曰城可灌爾蓋以地下於
西湖也至是孝宗卽位蓋十七年矣亮更名同詣闕上
書其略曰臣惟中國天地之正氣也天命所鍾也人心
所會也衣冠禮樂所萃也百代帝王之所相承也挈中
國衣冠禮樂而寓之偏方雖天命人心猶有所係然豈
以是爲可久安而無事也天地之正氣鬱遏而久不得
騁必將有所發泄而天命人心固非偏方所可久係也
國家二百年太平之基三代之所無也二聖北狩之痛

漢唐之所未有也方南渡之初君臣上下痛心疾首誓
不與之俱生卒能以奔敗之餘而勝百戰之敵及秦檜
倡邪議以阻之忠臣義士斥死南荒而天下之氣憤矣
三十年之餘雖西北流寓皆抱孫長息於東南而君父
之大讎一切不復關念自非海陵遂死淮南亦不知兵
戈爲何事也昔春秋時君臣父子相戕殺之禍舉一世
皆安之而孔子獨以爲三綱旣絕則人道遂爲禽獸皇
皇奔走義不能以一朝安然卒於無所遇而發其志於
春秋之書猶能以懼亂臣賊子今舉一世而忘君父之
大讎此豈人道所可安乎南師之不出於今幾年豈無

一豪傑能自奮哉其勢必有時而發泄矣春秋之末吳越起於小邦遂伯諸侯黃池之會孔子所甚痛也可以明中國之無人矣此今世儒者之所未講也臣請爲陛下陳國家立國之本末而開今日大有爲之略論天下形勢之消長而決今日大有爲之機惟陛下幸聽之唐自肅代以後上失其柄藩鎮自相雄長卒以成君弱臣彊王統數易之禍藝祖皇帝一興而四方次第平定藩鎮拱手以趨約束列郡各得自達於京師如臂使指無有留難兵皆天子之兵財皆天子之財紀綱總攝法令明備郡縣不得以一事自專也士以尺度而取官以資

格而進不求度外之奇才不慕絕世之雋功天子蚤夜
憂勤於其上以義理廉恥嬰士大夫之心以仁義公恕
厚斯民之生而二十年太平之基從此而立然契丹遂
得以倡狂恣睢與中國抗衡微澶淵一戰則中國之勢
浸微根本雖厚而不可立矣契丹之所以立勝中國者
其積有漸也立國之初其勢固必至此慶曆諸臣亦嘗
憤中國之勢不振矣而其大要則使群臣爭進其說更
法易令而廟堂輕矣嚴按察之權邀功生事而郡縣又
輕矣豈惟於立國之勢無所助又從而朘削之此所以
不能洗契丹平視中國之恥而卒發神宗皇帝之大憤

安石以正法度之說首合聖意其實欲籍天下之
兵盡歸朝廷別行教閱以爲彊也括郡縣之利盡入朝
廷別行封裕以爲富也青苗之政惟恐富民之不困也
均輸之法惟恐商賈之不折也罪無大小動輒興獄而
士大夫緘口畏罪矣西北兩邊至使內臣經畫而豪傑
恥於爲役矣徒使神宗皇帝見其財之數旣多銳然南
山征伐卒乖聖意而天下之勢實未嘗振也彼蓋不知
朝廷立國之勢正患文爲之太密事權之太分郡縣太
輕於下而委瑣不足恃兵財太關於上而重遲不易舉
祖宗惟用前四者以助其勢而安石竭之不遺餘力不

知立國之本末者真不足以謀國也元祐紹聖一反一復卒爲金人侵侮之資尚何望其振中國以威四裔哉南渡以來大抵遵祖宗之舊雖微有因革增損不足爲輕重有無如趙鼎諸臣固以不究變通之理況秦檜盡取而沮毀之忍恥事讎飾太平於一隅以爲欺其罪可勝誅哉陛下勵志復讎不免籍天下之兵以爲彊括郡縣之利以爲富臣恐尺籍之兵府庫之財不足以支一旦之用也陛下蚤朝晏罷冀中興日月之功而以繩墨取人以文法莅事臣恐程文之士資格之官不足當度外之明也藝祖經畫天下之大略太宗已不能盡用今

其遺意豈無望於陛下也陛下苟推原其意而行之可
以開社稷數百年之基而況於復故物乎不然維持之
具旣窮恐祖宗之積累亦不足恃也陛下試令臣畢陳
於前則今日大有爲之略必知所處矣夫吳蜀天地之
偏氣錢塘又吳之一隅當唐之衰錢鏐起王其地二百
年之間人物繁盛甲於東南及建炎紹興間爲六飛所
駐之地當時論者固已疑其不足以張形勢而事恢復
秦檜又從而備百司燕府以講禮樂於其中其風俗固
已華靡士大夫又從而治園囿臺榭以樂其生於干戈
之餘上下晏安而錢塘爲樂國矣一隙之地本不足以

容萬乘而鎮壓於五十年山川之氣蓋亦發泄而無餘
矣公卿將相大抵多江浙閩蜀之人而人才亦日以凡
下場屋之士以千萬數而文墨小異已足以稱雄於其
間矣陛下據錢塘已耗之氣用閩浙日衰之士而欲鼓
東南習安脆弱之衆北向以爭中原臣是以知其難也
荆襄之地在春秋時楚用以虎視齊晉而齊晉不能屈
也戰國之際獨能與秦爭帝其後三百餘年而光武起
於南陽又二百餘年遂爲三國交據之地又百餘年而
晉氏南渡荆雍常雄於東南而東南往往倚以爲強梁
竟以此伐齊及其氣發泄無餘而隋唐以來遂爲偏方

下州五代之際高氏獨當臣事諸國本朝二百年之間
降爲荒落之邦北連許汝民居稀少土產卑薄至于建
炎紹興之際群盜出沒於其間而被禍尤極議者或以
爲憂而不知其勢之足用也其地雖要爲偏方然未有
偏方之氣而六百年而不發泄者况其東通吳會西連
巴蜀南極湖湘北控關洛左右伸縮皆足以爲進取之
機今誠能開墾其地洗濯其人以發泄其氣而用之使
是以接關洛之氣則可以爭衡於中國矣是亦形勢消
長之常數也臣不佞自少有驅馳四方之志常數至行
都人物如林其論皆不足以起人意臣以是知陛下大

有爲之志孤矣辛卯壬辰之間始退而窮天地造化之
初攷古今沿革之變以推極皇帝王伯之道而得漢魏
晉唐長短之由天

際昭昭然可攷而知也始悟今

世之儒士自以爲得正心誠意之學者皆風痺不知痛
癢之人也舉一世安於君父之讎而方低頭拱手以談
性命不知何者謂之性命乎又悟今世之才臣自以爲
得富國彊兵之術者皆狂惑以肆叫呼之人也不以暇
時講究立國之本末而方揚眉伸氣以論富彊不知何
者謂之富彊乎陛下厲志復讎百代之英主也今乃委
任庸人籠絡小孺以遷延大有爲之歲月臣不勝憤懣

是以忘其賤而獻其愚陛下誠令臣畢陳於前豈惟臣區區之願將天地之神祖宗之靈實與聞之書奏孝宗赫然震動用种放故事召令上殿將擢用大臣交沮之乃有都堂審察之命宰相臨以上旨問所欲言皆落落不少貶又不合待命十日再詣闕上書謂臣不勝忠憤齎沐裁書願得望見顏色待命十日未有聞焉臣恐天下家傑有以測陛下之意向而雲合響應之勢不得而成矣又上書曰臣妄意國家維持之具至今日而窮而藝祖皇帝經畫天下之大指猶可恃以爲久臣不敢泄之大臣之前而大臣拱手稱旨以問臣亦姑取其大體

之可言者三事以答之其一曰二聖北狩天下之公憤也正在主上與二三大臣振作其氣以泄其憤使人人如報私讎此春秋書衛人殺州吁之意也其二曰國家之規模使天下奉規矩準繩以從事羣臣救過不給而何暇展布四體以求濟度外之功哉其三曰本朝以儒立國而儒道之振獨優於前代今天下之士熟爛委靡誠可厭惡正在主上與二三大臣反其道以教之作其氣而養之使臨事不至乏才隨才皆足有用臣所以爲大臣論者其略如此書旣上帝欲官之亮笑曰吾欲爲社稷開數百年之基寧用以博一官乎亟渡江而歸日

落魄醉酒醉中戲爲大言一士欲中亮以其事首刑部
侍郎何澹澹卽繳狀事下大理管掠亮無完膚誣服爲
不軌事聞孝宗知爲亮嘗陰遣左右廉知其事亮遂得
免居無何亮家僮殺人于境適被殺者嘗辱亮父次尹
其家疑事由亮聞于官論亮情重下大理時丞相准知
帝欲生亮而辛棄疾羅點素尚亮才援之尤力復得不
死亮自以豪俠屢遭大獄歸家益厲志讀書所學益博
其學自孟子後惟推王通章句研窮義理之精微辨析
古今之同異原心於秒忽較禮於分寸以積累爲工以
涵養爲正晬面盎背則於諸儒誠有愧焉至於堂堂之

陳正正之旗風雨雲雷交發而竝至龍蛇虎豹變現而出沒推倒一世之智勇開拓萬古之心胷自謂差有一日之長亮意蓋指朱熹呂祖謙等云高宗崩亮感孝宗之知至金陵視形勢復上疏曰有非常之人然後可以建非常之功求非常之功而用常才出常計舉常事以應之者不待知者而後知其不濟也時孝宗將內禪不報由是在廷交怒以爲狂恠光宗策進士亮以君道師道對且曰臣竊歎陛下之於壽皇莅政二十有八年之間寧有一政一事之不在聖懷而問安視寢之餘所以察辭而觀色因此而得彼者其端甚衆亦旣得其機要

而見諸施行矣豈徒一月四朝而以爲京邑之美觀也
時上不朝重華宮群臣迭諫皆不聽喜亮策謂善處
父子之間擢第一旣知爲亮又喜曰朕擢果不謬孝宗
在南內寧宗在東宮聞知皆喜授簽書建康府判官廳
公事未上卒亮志存經濟重許可人人見其肺肝與人
言必本於君臣父子之義雖爲布衣薦士恐弗及家僅
中產畸人寒士衣食之久不衰卒後吏部侍郎葉適請
于朝官其子非故典也端平初謚文毅更與一子官
鄭樵字漁仲莆田人好著書不爲文章自負不下劉向
揚雄居夾漈山謝絕人事久之乃游名山搜奇訪古遇

藏書家必借留讀盡乃去趙鼎張浚而下皆器之初爲
經旨禮樂文字天文地理蟲魚草木方書之學皆有論
辨紹興十九年上之以待講王綸賀允中薦得召對因
言班固以來歷代爲史之非授右迪功郎禮兵部架閣
以御史葉義問劾之改監潭州南嶽廟給札歸抄所著
通志書成入爲樞密院編修官尋兼攝檢詳諸房文字
因求人祕書省閱書籍未幾又坐言者寢其事卒年五
十九學者稱夾漈先生樵平生甘枯淡樂施與論者謂
其切切仕進蓋弗察也同郡林震字時隱擢進士第博
學深象數與樵爲金石交林光朝嘗師事之聚書數千

卷皆自校讎謂予曰吾爲汝曹復多產矣紹興中爲
敕令所刪定官力詆秦檜和議卽掛冠去當世高之
李道傳字貫之舜臣之子也稍長讀河南程氏書玩索
義理至忘寢食寧宗時登進士第歷蓬州教授吳曦反
曦黨以曦意脅道傳道傳以義折之竟棄官歸曦平詔
進官二等累遷祕書郎著作佐郎見帝首言憂危之言
不聞於朝廷非治世之象今民力未裕民心未固財用
未阜儲蓄未豐邊備未修將帥未擇風俗未能知義而
不偷人才未能彙進而不乏而八者之中復以人才爲
要至於人才盛衰繫學術之明晦願下明詔崇尚正學

遷著作郎。荷極等以新進用事，賄賂成風，道傳言：「今名優儒臣，實取材吏，剝剝殘忍，誣謾傾危之人進矣。」遂求補外，知真州。除提舉江東路常平茶鹽公事。初至，即按部劾貪縱，釋濫繫，弛負錢。夏大旱，道傳應詔言：「楮幣之換官民如讎，鈔法之行商賈疑怨，賦斂增加，軍將推剝，皆切中時病。」遂條上荒政。朝廷多從之。與漕臣真德秀振饑窮，多行風雪中。雖深村窮谷，必至，全活甚衆。擢宣州守。行朱熹社會法，諸郡翕然應命。胡棐爲吏部侍郎，薦道傳自代，引疾乞去，不許。召令奏事，再辭又不許。遂入對，言無所諱。除兵部郎官，監察御史。李楠覘當路。

憲乞授以節鎮蜀遂出知果州道卒年四十八詔特轉
一官致仕謚文節道傳篤於踐履氣節卓然臥榻屏間
大書喚起截斷四字其慎獨如此兄心傳

心傳字微之慶元元年薦于鄉既下第絕意不復應舉
閉戶著書晚因崔與之許奕魏了翁等之薦自制置司
敦遣至闕下爲史館校勘賜進士出身專修中興四朝
帝紀因言者罷添差通判成都府尋遷著作佐郎兼四
川制置司叅議官詔無人議幕許辟官置局踵修十二
朝會要端平三年召赴闕爲工部侍郎言成湯聖主也
而桑林之禱猶以六事自責陛下願治七年于此災祥

饑饉史不絕書願亟降罪已之詔修六事以回天心下
然民怨於內敵逼於外事窮勢迫何所不至陛下雖謀
臣如雲猛將如雨亦不知所以爲策矣未幾復以言去
奉祠居潮州淳祐元年罷祠復予又罷二年致仕卒年
七十八心傳有史才通故實然其作吳獵項安世傳褒
貶有愧秉筆之旨蓋其志常重川蜀而薄東南之上云
所著成書有高宗繫年錄學易編誦詩訓春秋考禮辨
讀史考舊聞証誤朝野雜記道命錄西陲泰定錄辨南
遷錄又有詩文一百卷無子以道傳之子爲後

宋史新編卷一百六十七

列傳一百九

明南京戶部主事莆田柯維騭著

儒林

程迥 劉清之 真德秀 魏了翁

廖德明 湯漢 何基 王柏

徐夢莘 夢莘字子幾 葉味道 王應麟 黃震

程迥字可久寧陵人後徙餘姚登隆興元年進士第歷知上饒縣已而奉祠寓番陽之蕭寺迥居官寬而明簡而信猾吏姦民皆感激悛悔褒表隱德潛善無問幽明聽決獄訟凡上官所未悉者必再三抗辨不爲苟止迥

嘗授經學於岷山王葆嘉禾聞人茂德嚴陵喻樗所著
有古易考古易章句古占法易傳外編春秋傳顯微例
目論語傳孟子章句文史評經史說諸論辨太玄補贊
戶口田制貢賦書乾道振濟錄等書卒官朝奉郎朱熹
以書告過予絢曰敬惟先德博聞至行追配古人釋經
訂史開悟後學當世之務又所通該曾不得一試而奄
棄盛時然著書滿家足以傳世是亦足以不朽絢以致
仕恩調巴陵尉攝邑事能理冤獄孫仲熊亦有名

劉清之字子澄臨江人其貧力學博極書傳登紹興二
十七年進士第歷調萬安縣丞師龔茂良以秣荒實跡

聞于朝又借諸公薦之發運使史正志按部督州縣時
零之賦清之不可有同年生在幕中謂曰侍郎將薦子
矣其以閥閱來清之貽之書謂羸資者皆州縣侵刻於
民法所當禁某誠不敢玷侍郎知人之鑒薦者兩赴審
察之命清之竟不見丞相詰吏部銓得知宜黃縣茂良
入參知政事與丞相周必大薦于孝宗召對首論民困
兵驕大臣退託小臣苟媿又言用人四事一辨賢否二
正名實三使材能四聽換授改太常寺主簿服除通判
鄂州差權發遣常州改衡州先是郡餽厨傳以事常平
刑獄二使者月一會集互致折餽清之歎曰此何時也

吾惟求無負於吾民足矣嘗作諭民書一編簡而易從
每因月講設酒肴宴諸生相與論學遠近來者築精舍
居之建閱武場按籍召閱悉革隱占之弊創朱陵道院
以祠先代節義名臣及本朝寇準周敦頤胡安國部使
者惡其不能媚已諷臺臣論其勞民用財遂予祠歸築
室授徒廷臣多薦之光宗即位起知袁州而疾作猶貽
書執政論國事諸生往候疾不廢講論及周必大來謂
曰子澄其澄慮清之氣息已微云無慮可澄遂卒清之
自舉進士有志義理之學所著有曾子內外雜篇訓蒙
新書外書戒子通錄等書

真德秀字景元後更爲景希浦城人四歲受書過目成誦登慶元進士第授南劍州判官復中博學宏詞科入閤帥幕召爲太學正嘉定初遷博士累遷起居舍人奏權姦擅政十有四年朱熹彭龜年以抗論逐呂祖儉周端朝以上書斥當時近臣猶有爭之者其後呂祖泰之貶非惟近臣莫敢言而臺諫且出力擠之則嘉泰之失已深於慶元矣史記之初羣賢皆得自奮未幾傅伯成以諫官論事去蔡幼學以詞臣論事去鄒應龍許奕又繼以封駁論事去故人務自全一辭不措設有大安危大利害羣臣喑嘿如此豈不殆哉今欲與陛下言勤訪

開廣謀議明黜陟三者而已時鈔法楮令行告訐繁興
抵罪者衆德秀奏或一夫坐罪而併籍其第之財或虧
陌四錢而沒入百萬之貲自此籍沒之產以漸給還兼
太常少卿言金人必亡君臣上下皆當以祈天永命爲
心使金道聞其國有難而返因請修墾田之政謂臣自
揚之楚自楚之盱眙沃野無際陂湖相連民皆堅悍強
忍此天賜吾國以屏障大江使強兵足食爲進取資也
時史彌遠方以爵祿縻天下士德秀慨然謂劉燭曰吾
徒須急引去使廟堂知世亦有不肯爲從官之人遂力
請出爲祕閣修撰江東轉運副使江東旱蝗廣德太平

其德秀與留守憲司大講荒政自領廣德太平興
德守魏峴同以便宜發廩使教授庠庠振給徽州寧國
守無善狀皆劾之而以李道傳攝徽先是都司胡觀薛
極每誚德秀迂儒試以事必敗至是政譽日聞因倡言
旱傷本輕監司奸名振瞻太過使峴劾庠以撼德秀德
秀上章自明朝廷悟與峴祠授庠幹官道傳尋亦召還
德秀進秩知泉州海賊作亂官軍敗衄德秀親授方略
禽之復審視形勢增屯要害以備不虞進秩知隆興府
母喪除授寶謨閣待制湖南安撫使知潭州以廉仁公
勤四字勵僚屬以周惇頤胡安國朱熹張栻學術源流

勉其士立惠民倉置社倉別立慈幼倉立義阡惠政畢
舉理宗卽位召爲中書舍人擢禮部侍郎直學士院入
見奏三綱五常扶持宇宙之棟榦奠安生民之柱石晉
廢三綱而劉石之變興唐廢三綱而安祿山之難作我
朝立國先正名分陛下不幸與人倫之變流聞四方所
損非淺雪川之變非濟王本志願討論雍熙追封秦王
舍罪恤孤故事濟王未有子息亦惟陛下興滅繼絕上
曰朝廷待濟王亦至矣德秀曰觀舜所以處象則陛下
不及舜明甚人主當以二帝三王爲師秦漢以下何足
法也帝曰亦是一時舍卒德秀曰此已往之咎願陛下

益講學進德以掩前失帝曰善德秀又乞收人心略曰

太平興國中秦邸事作太師王溥等議于朝堂者七十
有四人以大事不可輕也康定慶曆間求西帥必取當
世第一流宰相呂夷簡至忘讎薦進以重任不可輕也
往者雪川之獄未聞參聽于公朝淮蜀二閩皆出僉論
所期之外天下事非一家之私何惜不與衆共此收人
心之一事也賞罰適平則人莫得而議今有功罪同而
賞罰異者朝廷之於天下當如天地之於萬物栽培傾
覆付之無心可使一毫私意於其間哉此收人心之二
事也當乾淳間有位下朝以饋遺及門爲恥受任于外

以苞苴入都爲羞今薰染成風恬不之怪果若息天下之謗莫若反其物罪其人則心迹暴白此收人心之三事也治世氣象欲其寬裕不欲其迫蹙曩以訛言之故籍有譏呵之令焉譏呵則已過矣甚至於流竄焉殺戮焉都城之民搖手相戒宜解密網達下情此收人心之四事也又言朝廷之上敏銳之上多於老成政事之才富於經術雖嘗以耆艾褒傅伯成楊簡以儒學褒柴中行以恬退用趙蕃劉宰至於諫直敢言如陳宓徐僑皆未蒙記錄上嘉納之上初御清暑殿德秀因經筵侍上進曰惟學可以明此心惟敬可以存此心惟親君子可

以維持此心因極陳古者居喪之法與先帝視朝之勤
德秀屢進鯁言上皆虚心開納而彌遠益嚴憚之乃謀
所以相撼畏公議未敢發給事中王暨盛章始駁德秀
所主濟王贈典繼而殿中侍御史莫澤劾之遂以煥章
閣待制奉祠諫議大夫朱端常又劾之落職罷祠監察
御史梁成大又劾之請加竄殛上曰仲尼不爲已甚乃
止旣歸修讀書記語門人曰此人君爲治之門如有用
我執此以往紹定四年改職與祠五年進徽猷閣知泉
州迎者塞路城中歡聲動地決訟自卯至申未已或勸
啗養精神德秀謂郡弊無力惠民僅有政平訟理事當

勉彌遠歿上親政以顯謨閣待制知福州召爲戶部尚
書人見上迎謂曰卿去國一年每切思賢乃以大學衍
義進復陳祈天永命之說謂敬者德之聚儀狄之酒南
威之色盤遊弋射之娛禽獸狗馬之玩有一于茲皆足
害敬上欣然嘉納改翰林學士知制誥時政多所論建
端平二年已得疾拜參知政事三乞祠祿上不得已進
資政殿學士以內祠兼侍讀辭疾亟冠帶起坐迄謝事
猶神爽不亂遺表聞上震悼贈銀青光祿大夫德秀長
身玉立人咸以公輔望之立朝不滿十年奏疏無慮數
十萬言皆切當世要務直聲震朝廷四方人士翫其文

想見其風采宦遊所至惠政深洽不愧其言由是中外
頌都城人時驚傳頌洞奔擁出關曰直直院至矣果
至則又填塞聚觀不置時相益以此忌之輒擯不用而
聲愈彰及歸朝適鄭清之挑敵兵民死者數十萬尤世
道升降治亂之機而德秀則既衰矣杜範方攻清之誤
國且謂其貪黷更甚於前而德秀乃奏言此皆前權臣
玩愒之罪今日措置之失譬如和扁繼庸醫之後一藥
之誤代爲庸醫受責其議論與範不同如此然自侂冑
立僞學之名以錮善類凡近世大儒之書皆顯禁以絕
之德秀晚出獨慨然以斯文自任講習而服行之黨禁

既開而正學遂明于天下後世多其力也所著西山甲乙藁對越甲乙集經筵講義等書謚文忠

魏了翁字華父蒲江人年數歲日誦千餘言過目不再覽時稱神童年十五著韓愈論有作者風登進士第歷武學博士開禧元年召試學士院韓侂冑謀開邊了翁上言盍亦急於內修姑逭外攘不然舉天下而試於一擲宗社存亡係焉改祕書省正字明年遷校書郎以親老乞補外乃知嘉定府又明年侂冑誅朝廷收召諸賢了翁預焉會史彌遠入相專國事了翁察其所爲力辭召命丁生父憂解官心喪築室白鶴山下以所聞於輔

蕭子燔者開門授徒由是蜀人盡知義理之學差知漢
州又知眉州眉俗習法令持吏短長故號難治了翁禮
者苛拔俊秀行鄉飲酒禮增貢士員以振文風復葺頤
壇築江鄉館利民之事知無不爲嘉定四年擢潼川路
提點刑獄公事八年兼提舉常平等事遷轉運判官上
疏乞與周惇頤張載程顥程頤錫爵定謚示學者趣向
朝論違之如其請歷知潼川府十五年被召入對疏五
事又論郡邑強姦弱枝之弊所宜變通蓋自了翁去國
十有七年矣至是上進勞優渥嘉納其言進兵部郎中
俄改司封郎中兼國史院編修官轉對論江淮襄蜀當

分爲四重鎮爲聯絡守御之計次論邊疆田及實錄
闕文等事皆下其章中書累遷祕書監尋爲起居舍人
再辭而後就列入奏極言事變倚伏人心向背疆場安
危鄰寇動靜其幾有五又論士大夫風俗之弊謂君臣
上下同心一德而後平居有所補益緩急有所倚仗其
言無所忌避時相始不樂矣寧宗崩理宗自宗室入卽
位時事忽異了翁積憂成疾三疏求閒不得請遷起居
郎明年改元寶慶雷發非時上有欣心終夕不安之語
了翁入對卽論人主之心義理所安是之謂天非此心
之外別有所謂天地神明也陛下盍卽而求之則大本

而無事不可爲矣又論講學不明風俗浮淺立朝無
犯顏敢諫之忠臨難無伏節死義之勇顧敷求碩儒不
闡正學圖爲久安長治之計屬濟王黜削以死有司顧
望治葬弗虔了翁每見上請厚倫紀以弭人言俊應詔
言事最爲切至而了翁亦以疾求去右正言李知孝劾
胡夢昱竄嶺表了翁出關餞別遂指了翁倡爲異論將
擊之彌遠外示優容改樞尚書工部侍郎力以疾辭乃
以集英殿修撰知常德府越二日諫議大夫朱端常遂
劾了翁欺世盜名朋邪謗國降三官靖州居住紹定四
年復職奉祠尋知遂寧府辭不拜進寶章閣待制潼川

路安撫使知瀘州彌遠卒上親庶政進華文閣待制遂
應詔上章論十弊乞復舊典以彰新化上因民望與真
德秀竝召以爲權禮部尚書兼直學士院入對首乞明
君子小人之辨次論故相十失猶存又及修身齊家皆
切上躬兼同修國史兼侍讀俄兼吏部尚書復條十事
以獻皆苦心空臆直述事情上悉嘉納還朝六閱月前
後二十餘奏上將引以共政而忌者相與合謀排擯乃
以端明殿學士同簽書樞密院事督視京湖軍馬會江
淮督府曾從龍以憂興卒併以江淮付了翁朝論大駭
三學亦上書爭之適遇盜警皆至上心焦勞了翁嫌於避

事既五辭弗獲遂受命開府宣押同二府奏事進封臨
邛郡開國侯又賜便服詔書如張浚故事朝辭面賜御
書唐人嚴武詩及鶴山書院四大字仍賜金帶鞍馬詔
宰臣飲餞于闕外開幕府江州奏邊防十事甫二旬召
爲簽書樞密院事赴闕奏事時以疾力辭尋改資政殿
學士湖南安撫使知潭州復力辭詔予祠未幾改知紹
興府浙東安撫使嘉熙元年改知福州福建安撫使累
乞骸骨不允疾革口授遺奏少焉拱手而逝後十日詔
以資政殿大學士通奉大夫致仕遺表聞上震悼贈太
師謚文靖累贈秦國公所著有鶴山集九經要義周易

集義易舉偶周禮井田圖說經史雜抄等書

廖德明字子晦南劍人受業於朱熹登乾道進士第知莆田縣會有顯者欲取邑地廣其居德明不可守會僚屬諭之德明曰太守天子守上之臣未聞以土地與人者守乃慙服累官知潯州有聲選廣東提點刑獄彈劾不避權要歲當薦士朝貴多以書託之德明曰此國家公器也還其書不啓封有鄉人爲主簿德明聞其能薦之會德明行縣簿感其知己置酒假富人觴且甚盛德明怒曰一主簿乃若是侈耶必貪也於是追還薦章時盜陷桂陽追韶德明遣將馳擊親持小麾督戰大敗之

乃分戍守遠斥堠明賞罰布威信韶晏然如平時徙知
廣州遷吏部左選郎官奉祠卒德明初爲潯州教授爲
學者講聖賢心學手植三柏于學潯士愛之如其棠在
南粵時立師悟堂刻朱熹家禮及程氏諸書遠近化之
嘗語人以仕學之要曰德明自始仕以至爲郡惟用三
代直道而行一句而已有槎溪集行于世

湯漢字伯紀安仁人與其兄子巾中皆知名當時漢以
提刑趙汝騰薦差充象山書院堂長赴禮部別院試正
奏名授上饒縣主簿轉運使趙希堅言漢今海內知名
士也豈得吏之州縣哉詔循兩資差信州教授兼象山

書院長淳祐十二年差充史館校勘改國史實錄院校勘會大水未幾火災繼作漢先後上封事授太學博士轉對言太祖之天下壞其半者蔡京王黼也高宗之天下壞其半者鄭清之也又曰苟有志焉則其紀綱必先正根本必先疆藩籬必先固夫然後泮渙優游其樂無極舍此不務而徒以九重之深一笑之適以爲樂樂極而思之吾有朝廷而不能治也吾有黎民而無與保也起視四境而外侮又至矣雖有鄭衛之音燕趙之色建章之麗瓊林之積亦獨何樂哉召試館職連遷祕書郎轉對極言邊事以爲今日扶危救亂無復他策在乎人

主清心無欲盡用天下之財力以治兵大臣公心無我盡用天下之人才以彊本庶幾尚有以亡爲存之理耳提舉福建常平歷江東運判知隆興府召遷至太府少卿兼太子諭德改祕書少監疏論比年董宋臣聲焰薰灼其力能去臺諫排大臣結連兇渠惡德參會以致兵戈相尋之禍陛下灼見其故斥而遠之豈料陰消而并凝冰解而驟合旣得自便卽圖復用上下皇惑大小切齒而陛下方爲之辨明大臣方與之和解臣竊重傷此過計也自古小人復出其害必慘將逞其憤怨嘯其儔伍顛倒宇宙甚可畏也乞休致擢太常少卿求補外以

祕閣修撰知福州福建安撫改知隆興府度宗卽位累遷權工部尚書兼侍讀已而奉祠以端明殿學士致仕卒年七十一特贈正奉大夫謚文清漢介潔有守恬於進取有文集六十卷

何基字子恭金華人師事黃榦告以必有真實心地刻苦工夫而後可基悚惕受命於是隨事誘掖得聞淵源之懿來學者衆王柏弘論英辨質問難疑或一事至十往返基終不變以待其定嘗曰治經當謹守精玩不必多起疑論基文集三十卷而與柏問辨者十八卷景定五年以薦被命添差婺州學教授兼麗澤書院山長力

辭未竟理宗崩咸淳初授史館校勘兼崇政殿說書遷
辭改承務郎主管西岳廟終亦不受也卒年八十一國
子祭酒楊文仲請于朝謚文定所著大學發揮中庸發
揮大傳發揮易啓蒙發揮通書發揮近思錄發揮

王柏字會之金華人大父崇政殿說書師愈父朝奉郎
瀚俱得伊洛之學柏少慕諸葛亮爲人自號長嘯年踰
三十始捐去俗學勇於求道與其友汪開之著論語通
旨至居處恭執事敬惕然歎曰長嘯非聖門持敬之道
亟更以魯齋以何基嘗從黃幹得熹之傳卽往從之於
論語大學中庸孟子通鑑綱目標注點校尤爲精密作

敬齋箴圖夙興見廟治家嚴飭當暑閉閣靜坐子弟白
事非衣冠不見也來學者衆其教必先之以大學蔡抗
楊棟相繼守婺趙景緯守台聘爲麗澤上蔡兩書院師
鄉之耆德皆執弟子禮柏之言曰伏羲則河圖以畫八
卦文王推八卦以合河圖者先天後天之宗祖也河圖
是逐位奇偶之交後天是統體奇偶之交以四成數而
下上之上偶下奇莫匪自然又曰洪範初一日五行以
下六十五字爲洪範五皇極以下六十四字爲皇極經
此帝王相傳之大訓非箕子之言也又曰今詩三百五
篇豈盡定於夫子之手乃定二南各十有一篇兩兩相

配退何彼穠矣其棠歸之王風削去野有死麕黜鄭衛
淫奔之詩又曰大學致知格物章未嘗亡還知止章于
聽訟之上謂中庸古有二篇誠明可爲綱不可爲目定
中庸誠明各十一章其卓識獨見多此類也其卒整衣
冠端坐揮婦人勿近國子祭酒楊文仲請于朝謚文憲
所著有讀易記涵古易說大象衍義涵古圖書讀書記
書疑詩辨說讀春秋記論語衍義太極衍義伊洛精義
研幾圖魯經章句論語通旨孟子通旨書附傳左氏正
傳續國語等書

徐夢莘字商老臨江人幼慧耽嗜經史第進士歷官主

管廣西轉運司文字朝廷議易二廣鹽法遣廣西安撫
司幹官胡廷直與東西漕臣集議于境夢莘從行議與
廷直不合後廷直爲轉運使夢莘知賓州猶以前議爲
梗法罷去夢莘恬於榮進每念生於靖康之亂四歲而
江西阻訐母襁負亡去得免思究見顛末乃網羅舊聞
會粹同異爲三朝北盟會編三百五十卷自政和七年
海上之盟訖紹興三十一年完顏亮之斃上下四十五
十凡敕誥國書奏議記序碑志登載靡遺高宗聞而嘉
之擢直祕閣夢莘平生多著述有集補有會錄有讀書
志有集醫錄有集仙錄皆以儒學冠之卒年八十二

第得之說子天麟俱舉進士得之字思叔終通直郎致仕安負樂分著左氏國紀史記年紀等書天麟字仲祥歷官權發遣廣西轉運判官所至有惠政著西漢會要東漢會要等書晚作亭蕭灘之上畫嚴光像事之

葉味道初諱賀孫以字行更字知道溫州人師事朱熹試禮部第一時禁僞學味道對策率本程頤無所避知舉胡紘曰此必僞徒也黜之味道復從熹于武夷山中學禁開乃登第調鄂州教授理宗訪問熹之徒及所著書部使者以味道聞差主管三省架閣文字遷宗學諭輪對言人主之務學天下之福也必堅志氣以守所學

謹幾微以驗所學正綱常以勵所學用忠言以充所學授太學博士兼崇政殿說書帝忽問鬼神之理疑伯有之事涉於誕味道對曰陰陽二氣之散聚雖天地不能易有死而猶不散者其常也有不得其死而鬱結不散者其變也故聖人設爲宗祧以別親疏遠邇正所以教民親愛參贊化育今伯有爲厲爲之立子洩以奉其後則庶乎鬼有所知而神莫不寧矣蓋諷皇子竝事也三京用師廷臣邊閫交進機會之說味道進議狀以爲科朶日繁餽餉日迫民一不堪命龐勳黃巢之禍立見是究補其本無益於外也遷祕書著作佐郎而卒帝出內

裕賻其喪升一官任其後故事未有也所著四書說大學講義祭法宗廟廟享郊社外傳

王應麟字伯厚慶元府人九歲通六經淳祐元年第進士從王堦受學歷揚州教授初應麟登第言曰今之事舉子業者一切委棄制度典故漫不省非國家所望於通儒於是閉門發憤誓以博學宏詞科自見假館閣書讀之寶祐四年中是科應麟與弟應鳳同日生開慶元年亦中是科詔褒諭之添差浙西安撫司幹辦公事帝御集英殿策士召應麟覆考帝欲易第七卷寘其首應麟讀之乃頓首爲得士賀遂爲首選及唱名乃文天祥

也歷太常寺主簿面對言淮戍方警蜀道孔艱海表上
流皆有藩籬唇齒之憂軍功未集而吝賞民力旣困而
重斂非修攘計也時大全諱言邊事於是應麟罷未幾
大全敗起應麟通判台州遷至著作佐郎度宗卽位累
遷著作郎守軍器少監經筵人日雪帝問有何故事應
麟以唐李嶠李乂等應制詩對因奏春雪過多宜謹感
召又累遷起居舍人兼權中書舍人忤賈似道以祕閣
修撰奉祠久之起知徽州其父檣嘗守是郡父老皆曰
此清白太守子也召爲祕書監權中書舍人力辭不許
兼史職兼侍講遷起居郎兼權吏部侍郎時朝臣無以

邊事言者應麟指陳成敗逆順之說帝不懌似道復謀
逐之適以憂去及似道潰師江上授中書舍人兼直學
士院卽引疏陳十事進兼同修國史實錄院同修撰兼
侍讀遷禮部侍郎兼中書舍人日食應詔論消弭及備
禦之策皆不及用尋轉禮部尚書兼給事中丞相留夢
炎用徐囊爲御史擢江西制置使黃萬石等應麟繳奏
曰囊與夢炎同鄉萬石麤戾無學吳浚貪墨輕躁况夢
炎舛令慢諫讜言弗敢告今之賣降者多其任用之士
疏再上不報出關俟命再奏曰因危急而紊紀綱以偏
見而拂公議臣封駁不行與大臣異論勢不當留疏入

又不報遂東歸詔中使以翰林學士召識者以爲奪其
要路寵以清秩非所以待賢者應麟亦力辭後二十年
卒所著有深寧集玉堂類彙掖垣類彙詩攷詩地理考
漢藝文志攷證通鑑地理攷通鑑地理通釋通鑑答問
困學紀聞蒙訓小學紺珠玉海詞學指南詞學題苑筆
海等書

黃震字東發慈溪人寶祐四年登第度宗時爲史館檢
閱與修寧宗理宗兩朝國史實錄輪對言當時之大弊
曰民窮曰兵弱曰財匱曰士大夫無恥乞罷給度僧人
道士牒使其徒老死卽消弭之收其田入可以富軍國

紓民力時宮中建內道場故首及之帝怒批降三秩卽
出國門用諫官言得寢出通判廣德軍郡守賈蕃世以
權相從子驕縱不法震數與爭論是非蕃世積不堪疏
震撓政坐解官尋通判紹興府獲海寇僇之撫州饑起
震知其州多善政詔增秩遂升提舉常平初常平有怒
幼局爲貧而棄子者設父而名存實亡震謂收哺於旣
棄之後不若先其未棄保全之乃損益舊法凡當免而
貧者許里胥請于官贍之棄者許人收養官出粟給所
收家成活者衆改提點刑獄御史中丞陳堅以讒者言
劾震去遂奉雲臺祠賈似道罷相以宗正寺簿召將與

俞浙竝爲監察御史有內戚畏震直止之而浙亦以直言去移浙東提舉常平時皇叔大父福王與芮判紹興府遂兼王府長史震奏曰朝廷之制尊卑不同而紀綱不可紊外雖藩王監司得言之今爲其屬豈敢察其非奈何自臣復壞其法固不拜長史命進侍左郎官及宗正少卿皆不拜震嘗告人曰非聖人之書不可觀無益之詩文不作可也居官恒未明視事事至立決自奉儉薄人有急難則周之不少吝所著日抄一百卷其卒也門人私謚曰文潔先生